

OFFERYNNAU STATUDOL CYMRU

2022 Rhif 1058 (Cy. 223)

ADDYSG, CYMRU

Rheoliadau Addysg (Trefniadau Sefydlu ar gyfer Athrawon Ysgol) (Cymru) (Diwygio) 2022

<i>Gwnaed</i>	-	-	-	-	<i>12 Hydref 2022</i>
<i>Gosodwyd gerbron Senedd</i>					
<i>Cymru</i>	-	-	-	-	<i>17 Hydref 2022</i>
<i>Yn dod i rym</i>	-	-			<i>7 Tachwedd 2022</i>

Mae Gweinidogion Cymru yn gwneud y Rheoliadau hyn drwy arfer y pwerau a roddir iddynt gan adrannau 17 a 47(1) o Ddeddf Addysg (Cymru) 2014⁽¹⁾.

Enwi a chychwyn

1. Enw'r Rheoliadau hyn yw Rheoliadau Addysg (Trefniadau Sefydlu ar gyfer Athrawon Ysgol) (Cymru) (Diwygio) 2022 a deuant i rym ar 7 Tachwedd 2022.

Diwygio Rheoliadau Addysg (Trefniadau Sefydlu ar gyfer Athrawon Ysgol) (Cymru) 2015

2. Mae Rheoliadau Addysg (Trefniadau Sefydlu ar gyfer Athrawon Ysgol) (Cymru) 2015 wedi eu diwygio yn unol â rheoliadau 3 i 8.

Diwygio rheoliad 3 (dehongli)

3. Yn rheoliad 3(1)—

- (a) yn y diffiniad o “corff llywodraethu”, ar y diwedd mewnosoder “ac mewn perthynas ag ysgol berthnasol sy’n uned cyfeirio disgyblion, mae’n cynnwys pwyllgor rheoli’r uned cyfeirio disgyblion (os oes un)”;
- (b) yn y diffiniad o “pennaeth”, ar y diwedd mewnosoder “a’r athro neu’r athrawes sydd â chyfrifoldeb am uned cyfeirio disgyblion”;
- (c) yn y diffiniad o “diwrnod gwaith”—
 - (i) ar ôl “dydd Sul” mewnosoder “, Dydd Nadolig, Dydd Gwener y Groglith”, a
 - (ii) ar ôl “wyl banc” mewnosoder “yng Nghymru a Lloegr”;
- (d) yn y lle priodol, mewnosoder—

“mae i “uned cyfeirio disgyblion” yr un ystyr ag sydd i “pupil referral unit” yn adran 19A(2) o Ddeddf Addysg 1996(2);”.

Diwygio rheoliad 5 (corff priodol)

4. Yn rheoliad 5(1)—

(a) yn is-baragraff (a)—

- (i) hepgorer “neu” ar ôl “ysgol arbennig gymunedol neu sefydledig,” a
- (ii) ar ôl “(ym mhob achos o fewn ystyr y termau cyfatebol Saesneg yn Neddf 1998)” mewnosoder “, neu uned cyfeirio disgyblion”;

(b) hepgorer is-baragraff (b).

Rheoliadau newydd 6A a 6B

5. Ar ôl rheoliad 6 (gofyniad i ymgymryd â chyfnod sefydlu) mewnosoder—

“Terfyn amser ar gyfer cwblhau cyfnod sefydlu yn foddhaol

6A.—(1) Rhaid i gyfnod sefydlu gael ei gwblhau’n foddhaol o fewn 5 mlynedd sy’n dechrau gyda’r diweddaraf o blith y dyddiad pan ddyfernir statws athro neu athrawes gymwysedig, neu 7 Tachwedd 2022 (“y terfyn amser”).

(2) Ond pan fo’r corff priodol yn estyn y terfyn amser yn unol â rheoliad 6B, rhaid i’r cyfnod sefydlu gael ei gwblhau’n foddhaol o fewn y terfyn amser estynedig.

Estyn y terfyn amser ar gyfer cwblhau cyfnod sefydlu yn foddhaol

6B.—(1) Rhaid i’r corff priodol estyn y terfyn amser yn rheoliad 6A(1) ar gyfer person (pa un ai yw’r cyfnod a ganiateir, neu unrhyw gyfnod estynedig, wedi dod i ben ai peidio) pan—

- (a) bo cyfnod sefydlu’r person hwnnw yn cael ei estyn yn unol â rheoliad 10, 13(2)(b), 16(2)(c) neu (3)(c), a
- (b) na fo digon o amser ar gael o fewn y terfyn amser i’r corff priodol wneud penderfyniad yn unol â rheoliad 13(2).

(2) Caiff y corff priodol estyn y terfyn amser yn rheoliad 6A(1) ar gyfer person (pa un ai yw’r cyfnod a ganiateir, neu unrhyw gyfnod o estyniad, wedi dod i ben ai peidio) pan fo wedi ei fodloni bod rhesymau da dros wneud hynny a phan fo’r person yn cydsynio i hynny.

(3) Ni chaiff estyniad, neu gyfanswm cyfnod yr estyniad pan fo mwy nag un, fod yn hwy na 2 flynedd sy’n dechrau gyda’r diwrnod sy’n dilyn y diwrnod y daeth y terfyn amser yn rheoliad 6A(1) i ben, onid yw’n angenrheidiol yn rhinwedd paragraff (1).

(4) Rhaid i’r corff priodol, o fewn 10 diwrnod gwaith sy’n dechrau gyda’r diwrnod yr estynnwyd y terfyn amser yn rheoliad 6A(1) o dan baragraff (1) neu (2), anfon hysbysiad ysgrifenedig o’r estyniad at—

- (a) y person o dan sylw,
- (b) pan fo’r person o dan sylw yn cael ei gyflogi mewn ysgol berthnasol neu goleg AB, y corff llywodraethu a’r pennaeth,

(2) 1996 p. 56. Mewnosodwyd adran 19A(2) gan baragraffau 1 a 4 o Atodlen 2 i Ddeddf Cwricwlwm ac Asesu (Cymru) 2021 (dsc 4).

- (c) pan fo'r person o dan sylw yn cael ei gyflogi mewn ysgol annibynnol, y perchennog a'r pennaeth,
- (d) pan na fo'r person yn cael ei gyflogi gan y corff priodol, unrhyw gyflogwr arall (os nad oes hawl ganddo i gael hysbysiad o dan (b) neu (c)), ac
- (e) y Cyngor.

(5) Ceir rhoi hysbysiad o dan baragraff (4) drwy ffacs, y post electronig neu ddull cyffelyb arall sydd â chyfleuster i gynhyrchu dogfen sy'n cynnwys testun y cyfathrebiad, a rhaid ystyried bod hysbysiad a anfonir drwy ddull o'r fath wedi ei roi pan ddaw i law mewn ffurf ddarllenadwy."

Diwygio rheoliad 7 (sefydliadau y ceir ymgymryd â chyfnod sefydlu ynddynt)

6. Yn rheoliad 7, hepgorer paragraff (2)(b) a'r "neu" o'i flaen.

Diwygio rheoliad 8 (hyd cyfnod sefydlu)

7. Yn rheoliad 8—

- (a) ym mharagraff (1) yn lle "(3) a (4)" rhodder "(3), (4) ac (8)";
- (b) ym mharagraff (3)—
 - (i) ar ddiwedd is-baragraff (d) hepgorer "neu",
 - (ii) ar ddiwedd is-baragraff (e) yn lle "." rhodder "; neu", a
 - (iii) ar ôl is-baragraff (e) mewnosoder—
 - "(f) pan fo paragraff (8) yn gymwys.";
- (c) ym mharagraff (4)(b) yn lle "ym mhob achos arall" rhodder "pan fo paragraff (3)(a), (b), (c) neu (e) yn gymwys";
- (d) ar y diwedd mewnosoder—
 - "(8) Caiff y corff priodol, gyda chydysyniad y person o dan sylw, leihau hyd y cyfnod sefydlu y mae'n ofynnol i'r person ymgymryd ag ef i isafswm o un tymor ysgol neu 110 o sesiynau ysgol os yw'r corff priodol wedi ei fodloni bod y person wedi cyrraedd y safonau a grybwyllir yn adran 18 o Ddeddf 2014."

Diwygio rheoliad 13 (cwblhau cyfnod sefydlu)

8. Yn rheoliad 13(4), yn lle "dri" rhodder "10".

12 Hydref 2022

Jeremy Miles
Gweinidog y Gymraeg ac Addysg, un o
Weinidogion Cymru

NODYN ESBONIADOL

(Nid yw'r nodyn hwn yn rhan o'r Rheoliadau)

Mae'r Rheoliadau hyn yn diwygio Rheoliadau Addysg (Trefniadau Sefydlu ar gyfer Athrawon Ysgol) (Cymru) 2015 ([O.S. 2015/484 \(Cy. 41\)](#)) ("y prif Reoliadau"), sy'n ei gwneud yn ofynnol i bersonau sy'n ennill statws athro cymwysedig neu athrawes gymwysedig gwblhau cyfnod sefydlu yn foddhaol at ddibenion eu cyflogaeth fel athro neu athrawes mewn ysgol berthnasol (yn ddarostyngedig i eithriadau).

Mae rheoliad 3 yn diwygio'r diffiniadau o "corff llywodraethu", "pennaeth" a "diwrnod gwaith" yn rheoliad 3(1) o'r prif Reoliadau, ac yn mewnosod diffiniad o "uned cyfeirio disgyblion".

Mae rheoliad 4 yn diwygio rheoliad 5 o'r prif Reoliadau i ddarparu mai'r corff priodol ar gyfer uned cyfeirio disgyblion yw'r awdurdod sy'n ei chynnal.

Mae rheoliad 5 yn mewnosod rheoliadau newydd 6A a 6B yn y prif Reoliadau. Mae rheoliad 6A yn cyflwyno terfyn amser ar gyfer cwblhau cyfnod sefydlu yn foddhaol gan berson. Mae rheoliad 6B yn rhagnodi'r amgylchiadau y caniateir i'r terfyn amser hwnnw gael ei estyn odanynt, neu y mae rhaid i'r terfyn amser hwnnw gael ei estyn odanynt, gan gorff priodol.

Mae rheoliad 6 yn diwygio rheoliad 7 o'r prif Reoliadau i'w gwneud yn bosibl ymgymryd â chyfnod sefydlu mewn uned cyfeirio disgyblion.

Mae rheoliad 7 yn diwygio rheoliad 8 o'r prif Reoliadau, i ddarparu ar gyfer lleihau hyd cyfnod sefydlu gan gorff priodol o dan amgylchiadau penodol.

Mae rheoliad 8 yn cynyddu hyd y cyfnod a bennir yn rheoliad 13(4) o'r prif Reoliadau, y mae'n ofynnol i'r corff priodol anfon hysbysiad o'i benderfyniad ynddo ynghylch cwblhau'r cyfnod sefydlu, i 10 niwrnod gwaith.

Ystyriwyd Cod Ymarfer Gweinidogion Cymru ar gynnal Asesiadau Effaith Rheoleiddiol mewn perthynas â'r Rheoliadau hyn. O ganlyniad, lluniwyd asesiad effaith rheoleiddiol o'r costau a'r manteision sy'n debygol o ddeillio o gydymffurfio â'r Rheoliadau hyn. Gellir cael copi oddi wrth: Y Gangen Addysgeg, Gyrfa Gynnar ac Ymarferwyr Cymraeg, Yr Is-adran Addysgeg, Arweinyddiaeth a Dysgu Proffesiynol, Llywodraeth Cymru, Parc Cathays, Caerdydd, CF10 3NQ neu inductioninfo@llyw.cymru.